

DISCOVRS HEROIQUE

1729

PRESENTE

A LA REYNE

REGENTE

Pour la Paix,



A PARIS,

Chez GVILLAVME ET IEAN BAPTISTE LOY-  
son au Palais.

M. DC. XLIX.

*Avec Permission.*







DISCOVRS HEROIQUE  
PRESENTE  
A LA REINE  
REGENTE

Pour la Paix.



A D A M E,

Ceux qui nous font du bien ont vn empire si absolu sur nos volonte, que les peuples qui ont idolatré vn Iupiter vn Mars vn Mercure vne Diane vne Iunon se sont persuadez que c'estoit leurs Dieux & Déeses tutelaires, lors qu'ils ont encensé leurs Autels, & offert les victimes sanglantes à l'immolation erronée d'une fausse & phantastique diuinité: Il est vray que toutes les Natiōs les plus barbares se soumettent aux biens-faïcteurs, & il n'est point de cœur qui resiste aux attraits de la bonté quelque indomtable qu'il puisse estre, s'il n'est absolument priué de raison & de toute ratiocination iudicieuse, mais comme nous sommes attachez par les faueurs, nous sommes aussi bleffez dans la rencontre de la peine, ce qui nous incommode, altere nos affections; & quelque grace qu'une main ennemie possède de nous est odieuse, si elle s'arme pour nous nuire tant nous sommes naturellement portez contre ce qui nous choque, & à l'aigreur de nos ennemis, la nature mesme est continuellement en contraste dans ces oppositions, & pert dans le combat & la resistance toutes les forces de son composé, vsant esgalement les deux parties qui se piquent dans ces efforts. Mais comme la Loy de Dieu ne nous engage qu'à la souf-

A ij



france, les couronnes qu'il nous promet sont seulement pour  
 les debonnaires, qui passent par obeïssance chrestienne au  
 dessus de l'iniure sans resentment, prient pour ceux qui  
 les persecutent, & ne veulent point d'autre vangeance que  
 l'honneur d'estre tousiours exposez au tourment continuel  
 qui produit vn merite infini : La vertu ne consiste pas a vn  
 acte simplement, il faut vne habitude glorieuse pour pre-  
 tendre à l'aduantage d'un titre superlatif, Madame, c'est  
 par ce digne assemblage des parfaits escarboucles d'une vie  
 remplie de candeur & de probité, que les tissu des diuines  
 vertus dont vostre Maïesté est toute brillante ont fait voir à  
 vos peuples, que la douceur de cette Paix si necessaire à l'E-  
 stat & à nostre salut, est vn effet de vostre pieté & vne preue  
 tres concluante de vos bontez & des soins que vous auez  
 d'une Regence qui nous est si chere, plaise à celuy qui a soin  
 de vostre diademe & de nostre repos d'accepter toutes les  
 larmes des veufues & des orphelins, le sang respandu des su-  
 iets du Roy, dans vn pitoyable malheur en expiation des  
 fautes d'une imprudence tres punie, & que iamais plus il  
 ne paroisse, ny colere ny esmotion royale, ny publique en  
 France, Madame, vos Maïestez oublieront ie m'asseure le  
 pouuoir comptable que vous auez d'exterminer & de de-  
 struire, & n'agires qu'au reestablishement des oppressez,  
 comme des progeniteurs qui ont pardonné leurs enfans, &  
 i'ose bien assureur qu'il s'en trouue peu des coupables d'une  
 disgrâce si sensible, mais il n'appartient qu'à celuy qui fait lui-  
 re son soleil sur les bons, & les mauuais de faire vn dicerne-  
 ment de cette condition, avec le temps, sa Iustice separera le  
 bon grain de liuoyre, & osterá de la confusion & des tenebres  
 les pensees fermes & heroïques dans cette infailible atten-  
 te, vos Maïestez peuuent dire aux Parisiens ce que nostre  
 Seigneur dit à la Magdelaine beaucoup de pechez luy sont  
 pardonnez, par ce qu'elle a beaucoup aimé. Il faut aduoüer  
 cette verité, & que le François est tres louïable dans cette  
 extreme passion qu'il a pour son Prince, toutes les deuises  
 de leurs enseignes de guerre estoient les tesmoins de leur ze-  
 le, il ne respiroit que le repos & ne combattoit que pour le



pain, & à l'un & à l'autre, ils ont mérité l'honneur de vos  
 graces & le charme de leurs douleurs, Madame vos arden-  
 tes deuotions & les ieufnes austeres que vous faites en cette  
 sainte saison ont eu pitié de ceux que nos indigences nous  
 ont ordonnez, & lors que le temps de nostre redemption  
 nous est représenté par l'Eglise, vostre bonté touchée de nos  
 clameurs nous remet au premier point de nos tranquillitez,  
 toutes choses reprenent leur esclat au iour de la iustice que  
 vous aués rendu a nos soupirs & a nos larmes, les obiets ont  
 leur premiere beauté, & si vos Maiestez se venoiēt asseoir dās  
 leurs Palais, & leurs Louures de c'ette belle ville iamais elle  
 n'a esté plus pompeuse & magnifique, mais de cette felicité  
 q'en sera ce que Dieu en voudra ordonner, pourueu que nous  
 soyons certains de vos santés & de nos protections, nous vi-  
 uons despoir & de desir pour le bien de nostre Monarque,  
 & celuy de vostre Maiesté, tout le monde se promet que cet-  
 te paix vniuerselle resussitera tous nos contentemens, mais  
 personne nignore que la plus importante ne soit celle que  
 vous nous aués donnée, les anciens auoient vn Temple dédié  
 au Dieu de la paix, la France donne ses vœux & ses acla-  
 mations a vostre maiesté comme à la puissance fauorable qui  
 a exaucé ces tristes gemissemens, que toute la terre vous com-  
 ble d'honneur & de benediction, & que dans les cœurs de  
 vos fidelles subiets, vous trouuiés autant d'autels ou le serui-  
 ce de vostre Maiesté soit le vray agent de tous leurs mouue-  
 mens, qu'est ce que nous ne deuons pas a vne grande Reyne  
 de qui les humilitez & les modesties donnent des leçons à  
 toutes les Dames de son Royaume & de l'univers, exempte  
 de passion & absolument sobmise aux sages Directeurs, de sa  
 conscience, qui n'a que des Roys, des empereurs & des Saint  
 & des Saintes pour les chers parens du sang & les mode-  
 les de ces actions pieuses Madame, ce grand Dieu qui uous à  
 choisi pour le bien de la France s'offenceroit de nos meco-  
 gnissances, si nous ne donions a ce bon-heur tout ce que  
 nous sommes capables de cōcevoir de gratitude & destiné a  
 l'excellence de vos œuures, le Seigneur soit loüe a tous les  
 siècles qui à disposé vos mouuemens, par les ordres sacrez



de sa supreme sagesse, la campagne reuestue desmail & de parure ne sera plus rougie de sang de cruauté & de carnage elle sera embellie des fleurs & prendra vn nouuel ornement pour deslasser l'Esprit de vostre Maiesté des fatigues d'un soin importun, & au lieu des soupirs funestes des pauvres malheureux, les ramages charmants des oyseaux & les doux coulant murmure de riuers & des fontaines, diront à vostre abort de la part de leur souuerain, que toutes les creatures se pressent pour donner plaisir a cette grande Reyne qui a chassé les douleurs & les l'armes de son Royaume, il n'est si petit bergerot qui en benissant, son pain bis, ne benisse vostre Maiesté de l'auoir deliuré de la tyranie & de l'insolence du soldat. Madame, pensez ie vous supplie de quel prix est le repos de tout vn peuple & permettez nous d'en porter la gloire que vous auez aquisé par les accéns de nostre zele autant que nous respirerons l'aise d'une vie paisible & douce, que le brutal & le meconnoissant, sacrifie aux pieds de cete pieuse Reyne les deireglements, de son Esprit, infame & mercenaire, & que le suiet de quelque inuention pernicieuse ne le fasse plus choquer contre les loix du deuoir & de l'honneur, la iustice tient le poids & la balance, pour rendre au méchant ce qu'il a peu aquerir de iustice & de punition, il est vray que la misericorde regne hautement, elle tient son siege & son empire parmy nous à l'aduantage de nos defauts, mais sans encourir le blâme de malicieux, nous ne pouuons pas abuser de son indulgence, il faut, aiuster toutes nos pensées, & les vnissant en celuy qui est tout amour, par reflection soubmise à vne subordination necessaire, nous rendrons à nos superieurs & Maistres les deferences, que leur rang exigent de nos raisonnemens, & lors que nous subirons la loy nous resterons si satisfaits, que nous brauerons le destin & le bisarre cours de ces muances, il fut fondé autrefois à Rome vn Temple, à la vertu & a l'honneur & l'on ne pouuoit aller a celuy si que par le premier comme sa porte & son passage, ceste relation se trouue dans nos deuoirs diuins & humains, mais le principal but que nous



deuons auoir c'est d'aimer & honnorer nos Princes plus  
 pour leur legitime domination, que pour l'esper d'une  
 fortune, auetugle & incertaine, car Dieu qui a ordonné  
 les puissances superieures benit l'amour que les subiets  
 portent a leurs Roys, qui sont ses images en terre, de  
 cet amour procede la crainte, le respect des Loix du  
 Prince l'obeissance de ses commandemens & la ialou-  
 sie de sa gloire, & ces biens doiuent estre d'autant plus  
 estroits, que le prince est bon & glorieux, la ieunesse  
 du nostre est soutenue de vostre Maiesté, avec tant de  
 fermeté, que nous pouuons bien dire & a meilleur til-  
 tre que ce diserte Cheualier Romain parlant du l'ouä-  
 ble siecle de Traian, que nous sommes tres heureux de res-  
 pirer sous la lumiere de vostre regence, puis que vous  
 n'aués trouué du repos que vous n'ayés terminé nos mi-  
 seres, nous auons passé la mere rouge des tumultes & d'a-  
 larmes, mais par vos bontés, nous sommes dans la terre  
 de promission, vostre Maiesté deuant estre vn astre bril-  
 lant de mille clartés esbloüissantes, se doit autant signa-  
 ler par sa pieté que par sa puissance, & le Ciel qui a mis  
 dans vostre ame tant des grandeurs en benira l'esclat & ren-  
 dra vostre splendeur tres-heureuse, vostre prosperité  
 temporelle & eternelle seruira d'exemple à toute la terre, &  
 vos volontés donnerons agreablement la Loy à tous vos  
 subiets sans diuision n'y repugnance. Madame, ma plume  
 qui a tousiours voué ces traualx a l'honneur de vostre nom  
 n'a pas attendu les auctorités d'une regence pour témoigner  
 mon zele tres humble, tous les temps sont esgaulx à mes  
 fidelités, quoy que ie porte vn visage de douleur, mon cœur  
 est inflexible dans les fermes mouuemens de ces deuotions,  
 si vostre Maiesté se forme a l'exemple d'un Dieu, elle ne me  
 iugera pas par les defauts de mes biens, puis qu'elle me peut  
 perfectionner quand il luy plaira, mais par le long estude  
 que ie fais à l'honneur de son seruice, les saisons qui ont veu  
 tant des changemens n'en ont point trouués chez moy, non  
 plus pour mes treshumbles deuoirs à vostre Maiesté que pour  
 les manquemens de ma chetive vie, & quoy que ie souffre



Sans murmurer les amertumes de mes iours, il semble que  
 mes tristes l'angeurs en des accusations esloquentes contre  
 les grandeurs qui me cōsiderent, ie m' imagine que lors que ie  
 ne seray plus ma souffrance sera censurée & mon mal regreté  
 j'auoue pourtant que ie souhaiterois quelque allegemēt, ad-  
 uant cela mais ie ne puis pretendre à cette douceur que par  
 les mouuemens d'vne generosité & pieté Royale, & cette su-  
 preme & auguste vertu que mes humilités osent encor im-  
 plorer en qualité.

*M A D A M E,*

*De vostre Maiesté,*

La tres-humble & tres-obeyssante  
 seruante & suiette,

S. D. N.